

Miercus 25
S. Bede

Sabide 28
S. Just

Martars 31
B. Marian

Il proverbi
Rispiete,
se tu vuelis jessi rispietât



Il soreli
Ai 23 al jeve aes 5.21
e al va a mont aes 20.46

Joibe 26
S. Filip Neri

Domenie 29
Corpus Domini

Il timp
Cil seren.
Al rive il prin cjalt estîf

Lis voris dal mès
Al è il moment just par meti cevolis
di begonis, ciclamins,
ranuncui, spadis



La lune
Ai 29 ultin cuart

Vinars 27
S. Eutropi di Orange

Lunis 30
S. Luche Kirby

la GNOVE

+SKLET/XTREMETV Sports «estremis» in lenghe



+sklet/XtremeTV e je une serie televisive in lenghe furlane in 5 pontadis di 18 minûts ognidune, prodote di Informazion Furlane cu la poie de Agenzie regionâl pe lenghe furlane, che e

ufrîs al public une escursion fra lis ativitâts sportivis plui originâls che si fasin in lûcs naturalistics particolârs dal Friûl. Des cimis de Cjargne ae lagune di Grau e Maran, une ocasion par scuvierzi un microcosmi inspietât e sorprendent, fat di personis, lûcs e carateristicis che a fasin speciâl cheste region. Une produzion a bas cost cuntune dotazion lizere e une troupe di 5 personis, coordenade dal regist operadôr Giorgio Cantoni, ma cun risultâts emozionai e promozionai tant interessants. Dopo un prin passaç su Rai3 Friûl-Vignesie Julie, intal 2015, viodût l'interès dismovût, cumò la Rai e à decidût di tornâ a programâ la serie tacant di domenie ai 29 di Mai (aes 10.40 plui o mancûl). Chês altris 4 pontadis a saran mandadis intes domenis dopo: 5, 12, 19 e ai 26 di Jugn, simpri ae stesse ore. Par cui che al ves di pierdilîs, e je la pussibilitât di rivodi lis imagjins spettacolârs sul cjanâl 103 (Rai3 bis), duçj i miercus di Jugn (1, 8, 15, 22, 29), aes 21.50. Lis ativitâts sportivis documentadis de troupe di Cantoni a son stadis sietis pe lôr spettacolaritât e particularitât, pal impat ambientâl une vore bas e, ançje, pe facilitât di coinvolziment di un public no specialistic.

L'intervent dal president de Assemblee de comunitât linguistiche furlane, Diego Navarria, ae taule taronde «Friûl@Europe» li de Universitât di Udin

«Furlans discriminâts»

Al è stât marcât che furlan e todesc «si viodin» in Rai
une vore di râr; domandade une programazion in dutis
lis lenghis de region, grazie al inviament dal digjitâl terestri

CUANT CHE IN FRIÛL si fevele di dirits linguisticis e di informazion, par solit il discors al cole su la inosservance des leçs di tutele des minorancis de bande de societât concessionarie dal servizi public radiotelevisif. L'argoment al è saltât fûr ançje lunis ai 23 di Mai a Udin, all de Universitât, inte suaze de tierce edizion de taule taronde «Friûl@Europe». Un prin riferiment ae cuistion al è rivât in vierzidure dal incuintri inmaneât inte suaze dal Modul Jean Monnet MuMuCEI (Multilingualism, Multicultural Citizenship and European Integration) dal Dipartiment di Sciencis juridichis de Universitât dal Friûl, cuant che Claudio Cressati, professôr di Storie des dotrinis politicis e coordinadôr scientific di MuMuCEI, al à let il messaç di salût mandât dal president de Assemblee de comunitât linguistiche furlane, Diego Navarria. «O che lis leçs a son, ma no vegin metudis in vore, o ben che a vegin fatis buinis dal Parlament in maniere discriminatorie pai fur-

lans, cemût che al è sucedût tai câs dal "Italicum", de leç su la editorie local e de riforme de Rai», al à scrit Navarria. Il teme al è tornât te ultime part de cunvigne, cuant che su Europe, dirits, informazion e media si son confrontâts il diretôr di Onde Furlane, Mauro Missana, la gjornaliste e componente dal Comitât paritetico pe tutele de minorance slovene, Jole Namor, e il president dal Kanaltaler Kulturverein e component de comission regionâl pes minorancis di lenghe todescje, Alfredo Sandrini. Al è stât marcât che furlan e todesc «si viodin» in Rai une vore di râr – se no mancûl – e che al è dome in graciis dal inviament dal digjitâl terestri che finalmentri il segnâl de Rai3Bis, cu lis trasmissions, al è rivât ançje te provincie di Udin. Cumò che chel canâl al cuvierç dut il Friûl-Vignesie Julie – al è stât dit –, no si rive a capî parcè che no si rive a meti adun une programazion di cualchi ore ogni di in dutis lis lenghis de region, magari ançje cu la zonte di programs che a rivin de Austrie e de Slovenie, cum di plui



La Universitât dal Friûl e à dât acet ae taule taronde «Friûl@Europe».

che e je une robe che e va fate daûr des leçs e che e ven domandade de int e duncje che e à un so marcjât. Dongje di cheste propueste, fate indevant intant de discussion finâl cul public, al è stât memoreât il trentesim inovâl de muart di Altiero Spinelli, si à ricuardât la sô persone, la sô ativitât e il so impegn a pro de Europe unide e si à fat cualchi resonament in cont de Europe che e je e di chê che e mancje e che nus covente e di cemût che, dome cul rispiet dai dirits des minorancis e cu la promozion concrete des lenghis «altris» di chenti, il Friûl-Vignesie Julie al pues jessi pardabon une region europeane.

Storie de art furlane in lenghe/68..... Tancj tesauris di Fielis a Vençon

DIN UN CUC a cualchi interessante gleseute ator pal Friûl.

Comelians

Gleseute di Sant Nicolò. Il prin edifici al podarès jessi dal Dusinte e tornât a meti mans viers la metât dal '400. Aule retangolâr cul sofit e rêt di cuestas, presbiteri cuadrât cun sprolungjament cuvier a volts semicircolârs. Une bifore sul tor dal cjampanili, mûrs di claps e tocs stabilis. Il cuvier in planelis di crep dal puest. Tal interni afresc fats di dôs mans, une statue di len cun Sant Matie, forsît de scuele di Nicolò di Brunic dai prins dal Cincent, la Pale piturade e firmade di Zuan Antoni De Agostini, cuntune ricje suaze dal Siscent.

Fielis

Sante Marie di Mont (te foto a drete), gleseute pôc distant di Zui. La costruzion primitive e esisteve za tal 1488, dulà che al à lavorât ançje Domeni di Tumieç. Cui agns a son stâts fats diviers cambiaments e zontis. Tal interni un biel altâr maiôr intaiât sul stîl dal Comuzzi, metint drenti un Tritic in len che al risulde comissionât a Zuan Martini tal



1534, ma eseguît dai colaboradôrs e paiât ai erês dal mestri.

Dartigne

Gleseute di Sant Martin. Sul cuel dal cjistiel, intune iscrizion murade sore la puarte, e je la date de prime costruzion 1205 e di une ricostruzion dal 1303; sdrumade daspò il taramot dal 1511, e fo tornade e meti sù tra il 1515 e 1519. Une largje aule quadrade e presente il volt a crosere cu lis velis decoradis e afresc dal Zuan Pauli Thanner (1520 sù par jù).

Vençon

Gleseute fûr dal paîs avodade

di Sante Luzie. La costruzion e varès di jessi dai prins dal Cuatricent. Aule retangolâr cui tràfs a viste, presbiteri cuadrât forsît dai prins dal Cincent cul sofit a crosere, cjampanili a vele in muradure sul colm de façade cuntune barconute. Tal interni dôs statuis di piere (Apuestui) di man austriache de prime metât dal Cuatricent; una statue di len di Sante Luzie de man di Domeni di Tumieç o de sô buteghe de fin dal Cuatricent. La crosere dal presbiteri frescjade di cualchi dissepul dai tumieçins de prime metât dal Cincent.

BEPI AGOSTINIS



Gnûfs cartelins bilengâi furlan/talian tal Ort botanic di Udin. Ju àn fats i fruts de scuele medie di Travès

Gnûfs cartelins bilengâi furlan/talian pe sezion des plantis dal puest che a son tal Ort botanic di Udin (te foto). Ju àn fats e metûts i arlêfs dal laboratori di furlan «Vuardinsi ator» de scuele medie «Augusto Lizier» di Travès (che al coinvolç uns sessante fruts) in visite di istruzion cu lis mestris Maddalena Quaglia, Ivana Bozzer e Eugenia Capozzi te strutture che la Provincie di Udin e gjestis in vie Urbanis, tal centri studi de citât, tra i istitûts Malignani, Marinelli e Zanon. Tra lis gnovis ançje il boç didatic fat in gracie de colaborazion cul Consorzi provinciâl dai apicoltôrs di Udin.

Onoranze Funebri SORDO

di Sordo Gianni

SERVIZI COMPLETI PERSONALIZZATI E CONVENZIONATI OVUNQUE RICHIESTI

Servizio fotografico • Servizio necrologie
Servizio condoglianze • Servizi cimiteriali
Disbrigo pratiche e servizi cremazione
Allestimento camere ardenti • Vestizione, cosmesi e tanatoestetica • Trasporti nazionali ed esteri
Pubblicazione necrologie su quotidiani
Organizzazione servizio funebre a domicilio
Passaporto mortuario • Addobbi floreali in arte funeraria

REPERIBILITÀ 24/24H

ONORANZE FUNEBRI SORDO - 33030 BUJA - Via Prà di Tòs, 3
Tel. **0432.960189** - Cell. **3356787204** GIANNI
o.f.sordo@libero.it - www.onoranzefunebrisordo.com